

# Mahasiswa UMS baiki paip air graviti di Kg Kelawat

DE 3.1.2018 2  
**Iskandar Dzulkifli**

**TAMPARULI:** Bagi memastikan program kemasyarakatan terus diutamakan, sekumpulan mahasiswa Universiti Malaysia Sabah (UMS) melaksanakan pembaikan paip air graviti di Kampung Kelawat, di sini pada Isnin lepas.

Usaha murni dijalankan secara gotong-royong antara penduduk dan penuntut Pusat Luar UMS (PLUMS) selama dua hari itu turut membabitkan pemasangan dua buah tangki air berkapasiti besar.

Majlis perasmian program itu disempurnakan Ketua Program Pengeluaran Ternakan, Fakulti Pertanian Lestari UMS Kampus Sandakan, Profesor Madya Nur Hardy Abu Daud.

Pengarah Projek, Kennedy Juani berkata, pihaknya menyediakan peruntukan besar untuk memastikan program itu mencapai objektifnya antaranya membabitkan pemasangan paip air sejauh tiga kilometer.

Katanya, sebanyak 40 buah rumah mendapat manfaat daripada inisiatif bertemakan 'Prihatin Membawa Perubahan' itu yang terjejas bekalan air bersih akibat gempa bumi yang melanda tahun 2015 lalu.

"Lebih 400 penduduk mendapat manfaat daripada program kemasyarakatan ini, sekali gus mengakhiri kesukaran mereka mendapatkan bekalan air bersih untuk kehidupan seharian.

"Pihak kami juga menjalankan aktiviti bermanfaat lainnya seperti pendidikan, kempen kesihatan dan taklimat perniagaan membabitkan penternakan dan pembuatan telur masin.

"Justeru, program sama akan diteruskan di kawasan lain pada masa depan kerana ia dilihat bukan saja mampu membawa kebaikan tetapi juga perubahan kepada keperluan masyarakat kampung," katanya.

Sementara itu, Nur Hardy berkata, bekalan air bersih adalah elemen penting dalam kehidupan seharian masyarakat malah ia lebih diutamakan berbanding kemudahan lainnya.

Sehubungan itu, beliau menyeru pemimpin masyarakat supaya dapat terus membantu dan menyokong program seumpama itu demi kesejahteraan masyarakat, khususnya di luar bandar dan pedalaman Sabah.

"Program UMS-SISWAPRIHATIN ini adalah program interaksi institusi dengan masyarakat berteraskan keperluan pembangunan insaniah membabitkan tumpuan terhadap nilai-nilai kerjasama berkumpulan.

"Selain itu, ia turut melibatkan aspek kepimpinan serta meningkatkan daya interaksi dan komunikasi dengan masyarakat setempat, khususnya di kawasan luar bandar dan pedalaman di negeri ini," katanya.